

Sche gia la corda da laschiva è fascinanta...

Co as mettais vus avant la cultura spagnola? Probablmain fitg sumeglianta a la cultura svizra. Jau mezza n'avess era mai pensà, ch'i dettia tantas differenzas tranter il mintgadi en Svizra e quel en Spagna. Però gia suenter las emprimas emnas da mes semester d'Erasmus qua a Bilbao hai jau fatg stim, ch'i dat tuttina intginas differenzas. Davart quellas less jau rapportar curtamain en quest artigel sur da mes semester d'Erasmus en la citad la pli gronda dal Pajais Basc.

Spiert da cuminanza

L'emprima persuna basca che jau hai emprendi d'enconuscher era il taxist che m'ha purtà da l'aeroport da Bilbao en il center da la citad. Durant quest viadi da ventg minutas hai jau emprendi uschè bler davart sia famiglia e ses hobis, che jau ma sentiva bunamain sco sche nus ans enconuschessan gia dapi onns. L'emprima impressiun da la glied da Bilbao era pia fitg positiva e correspundeva era in zic al cliché ch'ins ha dals Spagnols – ch'els discurren gugent, fitg bler e cun mintgin e mintgina. Però adatg, ils Spagnols en il Pajais Basc na sa numnan betg Spagnols, els èn Bascs, ni «euskaldunak» en lur lungatg. Quai para dad esser fitg impurtant. Ils Bascs han in enorm spiert da cuminanza e paran dad esser fitg loschs da lur cultura e lungatg.

La festa da Bilbao

Suenter il viadi en il taxi hai jau emprendi d'enconuscher la locatura da l'abitaziun. Ella m'ha mussà l'abitaziun che vegniva ad esser mes da chasa per ils proxims tschintg mais. Fascinant en l'abitaziun era per exempel la maschina da lavar che sa chattava en cuschina, las plattas da gas, e la corda da laschiva cun «tetg» (ina construcziun da plastic encunter la plievgia) avant fanestra. La locatura da l'abitaziun m'ha era raquintà che jau saja arrivada en ina fitg bun'emna, cunquai che la gronda festa da la citad entschaivia la proxim'emna. Cun festa da citad s'imaginais vus ussa probablmain ina festa ch'ha lieu durant ina fin d'emna. Lez hai jau era supponì, hai dentant spert constatà che la festa da Bilbao cuzza nov dis. Ils suentermezdis avevi mintgamai events culturals sco ils sauts basics ni musica basca cun instruments speziels sco la «Txistu» (ina sort flauta cun in tun uschè aut ch'i fa mal las ureglias). Cura ch'il programm da suentermezdi era a fin, gieva la glied a la fiera ni a sautar en ina da las tendas cun musica e bar. Mintga di finiva cun in fiu artificial incredibel. Quest'entira festa ma pareva bunamain in zic stravaganta, ni «una locura», sco ch'ils Spagnols din.

Seser giadora

Però ils Bascs na van betg mo durant la festa gronda da bar a bar, mabain era durant ina normal'emna da lavur. Las bars èn a partir da la gievgia enfin la dumengia plainas da glied. Schizunt ussa, l'enviern cura ch'igl è sut 10°C fraid, sesa la glied giadora, mangia e baiva.

Il bel è che tut las generaziuns èn represchentadas en quellas bars, glied pli veglia sco era uffants, tuts paran dad esser integrads en la societad a Bilbao. Schizunt chauns èn commembers impurtants da la famiglia. Apparentamain vivan a Bilbao dapli chauns che uffants. Deplorablamain ha quai era l'effect ch'ins sto ir sin las vias fitg attentamain, uschiglio tatga spert ina giada ina surpraisa tuffanta vi dals chalzers.

Anc ditg savess jau raquintar vinavant da la vita qua en il Pajais Basc. Mintgant sun jau bunamain in zic surdamandada da tantas novas impressiuns, jau sai dentant che mintga nova experientscha qua è da gronda valur. In semester d'Erasmus è pia da recumandar a tuts e tuttas che vulan fugir dal trot dal mintgadi en Svizra ed experientiar ed emprender chaussas tut novas.

Madleina Candrian



In'impresiun dal feu artificial durant «Aste Nagusia», la «Fiesta Grande» da Bilbao.

FOTO MADLEINA CANDRIAN